

Protocol dalla radunonza communal dils 25 d'avrel 2014 allas 20.15 uras en casa da scola a Breil-vitg

- Perstgisas:** neginas
- Presenza:** 191 personas
- Hosps:** Marcus Caduff, president Surselva Turismus (tractanda 6)
- Tractandas:**
1. Beinvegni ed approbaziun dil protocol dalla radunonza dils 29 da november 2013
 2. Damonda da credit: Sanaziun dalla via Stetga - Bostg
 3. Damonda da credit: Sanaziun lingia d'aua, canalisaziun e meteo Stretga - Bostg
 4. Orientaziun: Stabiliments Bostg
 5. Vendita cumpart Casa Bunafin
 6. Informaziun e decisiun lescha taxas da hosps e turismus
 7. Varia

Beinvegni ed avertura

Il president communal, Richard Caduff, fa a tuts presents in cordial beinvegni ed orientescha la radunonza partenent entgins fatgs actualmein en elaboraziun. Vinavon declara el la situaziun turistica e che la nova lescha turistica hagi dau bia da discutir. El conferma che mo votants da Breil sapien prender part alla radunonza – secapescha seigi ei denton lubiu che, tenor basegns, personas dil fatg astgen dar plaid a fatg. Quei ton tier leschas sco era tier projects eav.

Sco dumbravuschs vegnan Ludovic Desax, Dardin, Maurus Cathomas, Breil, Vitus Livers, Breil e Pauli Cavegn, Breil, nominai ed elegi unanim.

L'invitaziun cun gliesta da tractandas, ei stada publicada treis gadas els davos fegls officials. Richard menziunescha, ch'ei vegni tier mintga tractanda fatg la damonda spustar tala ni buc.

1. Approbaziun dil protocol dalla radunonza communal dils 29 da november 2013

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol vegn per consequenza approbaus entras tscherna unanima.

2. Damonda da credit: Sanaziun dalla via Stretga - Bostg

Il president communal informescha sur dil project e las investiziuns previdas vid la via Stretga – Bostg.

Richard Caduff tschenta la damonda da spustar la tractanda ni buc ed arva la discussiun. Da tala vegn buca fatg diever. Cun 190 encunter 1 vusch vegn concludiu da buca spustar la tractanda.

Suenter cuorta discussiun decidan las vischinas ed ils vischins da conceder il credit da frs. 884'000.00 per la via Stretga – Bostg cun 189 encunter 2 vuschs.

3. Damonda da credit: Sanaziun lingia d'aua, canalisaziun e meteo Stretga - Bostg

Il president fa la damonda da spustar la tractanda ni buc. Cun tscharna unanima vegn decidiu da buc spustar la damonda da credit.

Richard Caduff dat informaziuns sur dallas investiziuns previdas. Dalla discussiun vegn buca fatg diever.

Vischinas e vischins apporbeschan il credit per la sanaziun dallas lingias d'aua, canalisaziun e meteo da frs. 878'500.00 cun tscharna unanima e senza resalvas..

4. Orientaziun: Stabiliments Bostg

Il messadi ei vegnius tarmess en tuttas casadas, aschia che tuts han giu la pusseivladad da studegiar tal. Il president communal, Richard Caduff, menziunescha aunc ina gada la necessitad dils stabiliments communal Bostg.

A diveras damondas sa il president rispunder.

Il cussegl da vischnaunca sco era la suprastanza recamondan d'approbar il project all'urna dils 18 da matg 2014.

5. Vendita cumpart Casa Bunafin

Richard Caduff informescha sur dalla intenziun da vender la cumpart dalla Casa Bunafin. La vischnaunca posseda ina cumpart da 151/1000 vid la Casa Bunafin (duas garaschas). La valeta tenor schazetg munta a frs. 70'500.00. En cass ch'il pievel decida da construir ils stabiliments ol Bostg fa la suprastanza sco era il cussegl da vischnaunca la proposta da vender quella cumpart alla cunproprietaria, la Brigels Gastro AG, per frs. 115'000.00.

Richard Caduff tschenta la damonda da spustar la tractanda ni buc. Cun tscharna unanima vegn concludiu da buc spustar quella tractanda.

Dalla discussiun vegn buca fatg diever. Vischinas e vischins decidan unanim da vender la cumpart dalla Casa Bunafin (duas garaschas) per frs. 115'000.00 a Brigels Gastro AG, quei cun la resalva che la votaziun dils stabiliments Bostg va atras ils 18 da matg 2014.

6. Informaziun e decisiun lescha taxas da hosps e turismus

Tier quella tractanda ei era Marcus Caduff envidaus. Igl ei previu ch'el informescha en detagl sur dalla revisiun da lescha ed era dallas midadas fatgas sin fundament dalla procedura da consultaziun.

Sco che Marcus Caduff entra fa sgr. Roman Müller attents tut ils presents che la vischnaunca hagi scret che mo tals che hagian il dretg da votar a Breil astgien prender part alla radunonza. Siu votum vegn quitaus cun protestas e risadas ord il publicum. Il president conferma a sgr. Müller d' haver sclariu da damonda cun representants dil Cantun GR a Cuera e lez hagian confirmau che la presenza d'experts seigi usitada e pusseivla en tals cass. Sin quei votum dat ei neginas reacziuns. Secapescha banduna Marcus Caduff la radunonza avon la votaziun.

Richard Caduff menziunescha che la vischnaunca hagi survegniu ina brev (Rüge) en connex cun pliras caussas partenent la radunonza. Quella vegni tarmessa a Cuera alla dertgira administrativa dil Cantun Grischun.

Il president informescha sur dil curriu e passau il davos temps en nossa regiun turistica. Vinavon repassa el las seras d'informaziuns che han giu liug el mars per ils indigens sco era per ils proprietaris da secundas habitaziuns.

Ils puncts principals sco era las midadas ch'ei vegnidas fatgas sin fundament dalla consultaziun vegnan menziundas.

Marcus Caduff, president da Surselva Turismus, informescha medemamein sur dalla lescha nova cun entginas quintaziuns e cumparegliaziuns cun la veglia lescha.

Suenter vasta discussiun fa il president la damonda da spustar la tractanda ni buc. La votaziun vegn fatga en scret.

Vischinas e vischins han votau cun 159 gie, 31 na ed 1 vit da buca spustar la tractanda. Marcus Caduff banduna la radunonza.

La discussiun vegn aunc ina gada aviarta. Da quella vegn buca fatg diever ed ei vegn votau giu a scret sur dalla lescha. Vischinas e vischins han votau cun 144 gie, 41 na e 5 abstenziuns d'acceptar la lescha da hosps e turissem.

Cun quella decisiun ei Breil l'emprema vischnaunca da Surselva Turismus che ha acceptau la nova lescha.


Richard Caduff engrazia per la gronda confidonza demussada.

7. Varia

Richard Caduff engrazia per la presenza, la participaziun e la confidonza e siara la radunonza allas 22.45 uras.

Breil, ils 28 d'avrel 2014

Il president



Igl actuar

